

**Reezal Merican sambut baik Pakej Rangsangan Ekonomi**  
**Astro Awani**  
**29 Mac 2020**  
**Asyraf Roslan,**

KUALA LUMPUR: Menteri Belia dan Sukan, Datuk Seri Reezal Merican menyambut baik Pakej Rangsangan Ekonomi yang telah diumumkan oleh Perdana Menteri, Tan Sri Muhyiddin Yassin, pada Jumaat.

Menurutnya, pakej yang diumumkan ini sangat penting terutamanya kepada rakyat yang menempuh tempoh sukar sepanjang penularan wabak COVID-19.

"Saya ingin mengucapkan terima kasih kepada Perdana Menteri, atas pengumuman Pakej Rangsangan Ekonomi yang cukup komprehensif, berani dan yang paling penting untuk membantu rakyat semua lapisan dan segenap bangsa," katanya melalui satu rakaman video.

Bantuan Prihatin Nasional ini bukan sahaja melibatkan golongan B40 malah M40 juga turut mendapat bantuan yang sama.

Belia yang berumur 21 tahun ke atas juga diberi bantuan sebanyak RM800 bagi mereka yang mempunyai pendapatan RM2,000 kebawah manakala mereka yang mempunyai pendapatan RM2,000 sehingga RM4,000 pula diberi bantuan sebanyak RM500.

Tidak dilupakan golongan mahasiswa turut mendapat bantuan sebanyak RM200 melalui Bantuan Prihatin Nasional.

Pada masa sama, penangguhan pembayaran PTPTN dan Perbadanan Tabung Pembangunan Kemahiran yang membabitkan lebih kurang 174,000 pelajar juga

dilihat sebagai satu bantuan yang amat signifikan dan cukup bermakna untuk golongan belia.

Pakej Rangsangan Ekonomi Prihatin Rakyat yang diumumkan Perdana Menteri, Tan Sri Muhyiddin Yassin dilihat dapat memberi kelegaan bagi rata-rata rakyat di negara ini meskipun berdepan tempoh sukar sejak Perintah Kawalan Pergerakan (PKP) dilaksanakan pada 18 Mac lalu.

Menerusi perkongsian di laman Twitter Astro AWANI mendapati ramai pihak yang berterima kasih dan berpuas hati dengan manfaat yang melibatkan kakitangan kerajaan, golongan B40, M40, pengusaha Industri Kecil dan Sederhana (IKS), sektor korporat dan swasta, bujang, mahasiswa serta pesara kerajaan.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/reezal-merican-sambut-baik-pakej-rangsangan-ekonomi-235823>